

【孤栖个白鸚哥<sup>1</sup>】彭瑞珠原作

去學校个路項，會經過一頭當大頭个番樣樹<sup>2</sup>。朝晨，遠遠就聽著，當多鳥仔在樹頂搞到異大聲，當鬧熱。一開始，係幾隻白頭公在該緊講「出力，出力！出力，出力！」；續等，嗰嘍屎仔<sup>3</sup>乜來加油講「遽遽，啾啾！遽遽，啾啾！」；過咗，係一陣屋簷鳥「唧唧唧唧、唧唧唧唧」在樹頂開會个聲哨。

想，今晡日仰會有恁多鳥仔在樹頂搞呢？係，熱天个樹頂較涼爽？還係，樹頂還有當多番樣好食？臥頭看往上，無啊，番樣都分人摘淨咗，就伸著一樹个青葉定定。還過，啾啾滾个鳥仔，乜看毋著半隻，就聽著屋簷鳥還在該開會个聲定定。毋過，屋簷鳥實在倘<sup>4</sup>細隻咗，因在比佢兜大恁多个番樣葉裡肚，當然也看無。

日時頭，還在該緊想，仰明明聽著恁多鳥仔聲，又看毋著半隻，行過樹下，乜無看著鳥仔飛走啊，還怪奇嘍！放學个時

節，共樣行該條路，還行到番樣樹下，就看著番樣樹脣項个楊桃撥撥跌<sup>5</sup>咗。看一下四圍，無風啊，過看一下楊桃樹頂，無人啊！該，楊桃仰會自家跌下來呢？行過去看，會行到樹下哩，就聽著樹頂有英文同講「哈囉<sup>6</sup>！」

原來，係一隻調皮个白鸚哥。朝晨，樹頂該陣鳥仔聲，就係你嘍！遠遠有鳥仔飛過，你就同人喊加幾聲仔鬥鬧熱，難怪會聽著恁多鳥仔聲，又看毋著鳥仔。乜行過去同佢「哈囉」，毋過，佢全無插。

像係使性个細人仔樣仔，佢嘴嘟嘟仔，用腳抓<sup>7</sup>起一粒楊桃，喫一口就同佢擲忒。楊桃還行跌落地泥，佢又抓起另外一粒楊桃來喫，大粒、細粒，有熟、冇熟个楊桃，分佢擲到一地泥就係。

白鸚哥，係毋係倘孤栖咗呢？雖然，佢無插，還係「三隻鼻公笏」，異閒管个勸話佢講：「白鸚哥啊，你莫恁仔！楊桃又無得失你，做麼个尋佢兜出水呢？若屋下人，乜怕係尋你尋到當愁哦！你愛轉去無？你係孤栖，來同你做朋友，好無？」

<sup>1</sup> 鸚哥：音 en' go'；鸚鵡。白鸚哥，白色的鸚鵡。

<sup>2</sup> 番樣樹：音 fan' son su；芒果樹。

<sup>3</sup> 嗰嘍屎仔：音 bid lid sii' e'；綠繡眼。

<sup>4</sup> 倘：音 tiong'；太。

<sup>5</sup> 撥撥跌：音 bad bad died'；紛紛掉落。

<sup>6</sup> 哈囉：音 ha lo'；源自英文 Hello，你好之意。

<sup>7</sup> 抓：音 sa'；抓取。